

南無華嚴會上佛菩薩（三稱）

大方廣佛華嚴經入不思議解脫境界普賢行願品卷第七

爾時海幢比丘，從其眉間白毫相中，出無量百千阿僧祇，佛剎極微塵數帝釋天王，威德光明，超過天眾。捨離世間一切欲樂，於諸境界而得自在，摩尼寶珠以繫其頂，身光暎蔽諸天宮殿，震動一切須彌山王，覺悟一切放逸天眾。歎福德力、說智慧力、生其樂力、持其志力、增其所有清淨念力、堅其所發菩提心力；讚樂見佛，令除世欲；讚樂聞法，令厭世間；讚樂觀智，令絕世染；止修羅戰、斷煩惱諍、滅怖死心、發降魔願、興立正法；須彌山王，成辦眾生一切事業，念念調伏無量眾生。如是所作，周徧法界。

從其額上，出無量百千阿僧祇，佛剎極微塵數諸梵天王。色相端嚴，世間無比，威儀寂靜，言音美妙，請佛轉法，歎佛功德，令諸菩薩心生歡喜，能辦眾生無量事業。如是普徧十方法界。

從其頭上，出無量百千阿僧祇，佛剎極微塵數諸菩薩眾，皆以相好莊嚴其身。其諸菩薩，各於其身肢節毛孔，一切普放大光明雲，顯現諸佛往昔所行菩薩行海，宣說菩薩種種妙行。所謂：普徧十方一切世界，稱揚讚歎，一切諸佛往昔所行檀波羅蜜，施者、受者、及所施物，并所隨順相應行海；示導一切慳吝眾生永離慳著，成就捨心，常行惠施攝取眾生，

令住無上檀波羅蜜，顯示諸佛相好功德，令得眾寶莊嚴世界，及示依正所出生因，令諸眾生愛樂修習。

普徧十方一切世界，稱揚讚歎，一切諸佛往昔所行尸波羅蜜，并所隨順相應行海；令諸眾生，於五欲境，深生厭離，於諸佛境專意趣求，除顛倒想，恆正思惟，斷邪分別，永離諸惡，念菩薩戒，攝諸眾生住大慈悲，稱讚解脫，護持如來究竟戒品，普令眾生住於佛戒；說一切有，悉皆如夢，了達諸法，自性皆空，說諸欲樂，無有滋味，令諸眾生，遠離欲縛，出煩惱垢。

普徧十方一切世界，稱揚讚歎，一切諸佛往昔所行忍波羅蜜，并所隨順相應行海；令諸眾生得法自在，得心自在，具忍辱力；稱揚讚歎金色身業，離瞋恚垢；起慈悲行，止殺害心，絕畜生道。

普徧十方一切世界，稱揚讚歎，一切諸佛往昔所修勤波羅蜜，并所隨順相應行海；令諸菩薩精進勇猛，為一切智，勤求正法，供養承事一切如來，恭敬讚歎，心無疲厭；令諸世間不起放逸，攝取眾生令離苦蘊，入佛究竟圓滿智海。普徧十方一切世界，稱揚讚歎，一切諸佛往昔所修禪波羅蜜，并所隨順相應行海；令其散滅塵勞障翳，永捨憍慢，不起貪瞋，蔭清涼雲，除煩惱熱，竭生死海，摧業結山，調伏眾生，安

住妙法，究竟令其心得自在。

普徧十方一切世界，稱揚讚歎，一切諸佛往昔所修般若波羅蜜，并所隨順相應行海；普耀正見智慧電光，令諸眾生照達本性，普震清淨妙法雷音，令諸眾生增長功德，摧滅一切我慢高山，拔出一切諸見毒箭，抉除一切疑惑翳膜，令諸眾生得自在智。普徧十方一切世界，稱揚讚歎，一切諸佛往昔所修方便波羅蜜，并所隨順相應行海；隨順世間種種所作，令諸眾生究竟成熟。雖普調伏一切眾生，而於眾生無所染著；雖普照明諸佛眾會，而於眾會心無所著；雖離生死，而於諸趣自在受生；雖現世間，而於涅槃入出自在；雖能了達生死涅槃無二無別，而常善巧饒益眾生。安住菩薩圓滿自在，超出世間，到於彼岸。

普徧十方一切世界，稱揚讚歎，一切諸佛往昔所成願波羅蜜，并所隨順相應行海；令諸菩薩盡未來際，乘四願輪，遊正覺路，徧周剎海，利樂眾生，摧無明山，裂愛欲網，解眾結縛，永滅無餘，示現神通種種變化，令諸眾生壽命自在。普徧十方一切世界，稱揚讚歎，一切諸佛往昔所成力波羅蜜，并所隨順相應行海；演說菩薩大總持力，方便法音妙辯才力，成熟眾生廣大願力，摧伏魔怨智自在力，制諸外道心無畏力。身力堅固猶若金剛，能碎一切大鐵圍山，能滅十方一切劫火，能竭海水，能吞猛風，掌擊虛空所有世界，而於身力

無有損減，令諸眾生淨治三昧，普於一切自在受生。

普徧十方一切世界，稱揚讚歎，一切諸佛往昔所修智波羅蜜，并所隨順相應行海；分別演說種種智地，所謂：普生諸佛十力、無畏、一切功德具足智地，普滿諸佛一切相好自在莊嚴具足智地，普發菩薩一切大願具足智地，普徧攝受一切眾生具足智地，普為眾生顯示無我具足智地，普徧觀察一切眾生種種心念具足智地，普徧分別一切眾生根解差別具足智地，普徧隨順一切眾生信樂差別具足智地，普徧了知一切眾生，甚深業海無量差別具足智地，普徧趣入一切眾生，無量願海心樂差別具足智地。

從其頂上肉髻之中，出無量阿僧祇，佛剎極微塵數如來之身，其身最勝，世無能比。諸相隨好清淨莊嚴，威光赫奕，如真金山。無量光明普照十方，演妙圓音普周法界，示現無量大神通力，為諸世間普雨法雨，隨其所應，皆令獲益。

所謂：為坐菩提場諸菩薩雨大法雨，名平等現前智；為灌頂位諸菩薩雨大法雨，名普門法界；為法王子位諸菩薩雨大法雨，名入諸菩薩普莊嚴門；為童真位諸菩薩雨大法雨，名住堅固山大法智雲；為不退位諸菩薩雨大法雨，名普徧莊嚴平等海藏；為成就正心位諸菩薩雨大法雨，名以金剛智普照境界；為方便具足位諸菩薩雨大法雨，名普攝眾生自性莊嚴門

；為生貴位諸菩薩雨大法雨，名如來圓滿隨順世間；為修行相應位諸菩薩雨大法雨，名演法本際悲愍世間；為治地位諸菩薩雨大法雨，名積集法藏；為初發心諸菩薩雨大法雨，名普攝眾生平等莊嚴；為廣大信解諸菩薩雨大法雨，名如來願藏無盡解脫；為無色界諸天雨大法雨，名普門智無盡藏；為梵世諸天雨大法雨，名無量教聲普門智藏；為他化自在天雨大法雨，名能生法力資具無盡藏；為諸魔眾雨大法雨，名種種心幢勤求一切智；為化樂諸天雨大法雨，名淨念智寶住種種善軌；為兜率諸天雨大法雨，名菩薩生意種種願寶幢；為夜摩諸天雨大法雨，名隨順如來淨念歡喜藏；為忉利諸天雨大法雨，名疾見如來出生莊嚴愛樂藏；為諸龍王眾雨大法雨，名出生菩薩厭離龍趣，種種神變歡喜幢；為夜叉王眾雨大法雨，名見佛歡喜普徧法界如來神變藏；為乾闥婆王眾雨大法雨，名一切如來集法音聲雲；為阿修羅王眾雨大法雨，名金剛智輪大法境界；為迦樓羅王眾雨大法雨，名無邊光明出生一切如來方便；為緊那羅王眾雨大法雨，名一切如來饒益世間殊勝智雲；為摩睺羅伽王眾雨大法雨，名愛樂速疾增長法；為諸人王眾雨大法雨，名得一切眾生勝智慧法；為地獄眾生雨大法雨，名寂靜音聲正念莊嚴；為畜生眾生雨大法雨，名隨順如來，具智慧藏無惡業道聲；為閻羅王界眾生雨大法雨，名不捨眾生出生如來波羅蜜聲；為諸厄難處眾生雨大法雨，名寂靜音聲普徧安慰，悉令眾生永離憂苦，咸得入於賢聖眾會。如是所作，充滿十方一切法界。

海幢比丘各於其身一切毛孔，一一皆出無量阿僧祇，佛剎極微塵數大光明網；一一光明，具阿僧祇色相；一一色相有阿僧祇莊嚴；一一莊嚴現阿僧祇境界；一一境界辦阿僧祇事業。如是普徧十方方法界。

爾時善財復於如是大光網中，悉見海幢往昔，所修一切菩薩三世所行檀波羅蜜，悉捨一切內外所有圓滿施行。往昔所修一切菩薩三世所持尸波羅蜜，從初發心盡未來劫，誓捨身命，不起一念毀犯之心。往昔所修一切菩薩三世相應忍波羅蜜，或遇損害頭、目、手、足，斷截肢節，惡言毀辱，悉能安受無有動亂；恆思捨離怨害之心，觀自他身，無有我相，生大慈悲成一切智，以是因緣，獲得菩薩具足相好自在色身；示一切身，於一切處，經一切劫，受一切苦，勤求正法，利益眾生，不起一念厭退之心；種種神變，普徧十方，等眾生界，現一切身，如影隨形，充滿法界。

往昔所修一切菩薩三世所行勤波羅蜜，所學三世諸佛菩薩，勇猛精進離相妙行，所現種種神通變化，震動十方一切世界諸大海水；令諸眾生精勤匪懈，厭生死海，出離魔界，一切外道無不怖懼，一切魔軍無不摧碎，光照十方一切法界；令諸菩薩修種種行，種種神變普利眾生。往昔所修一切菩薩三世所求禪波羅蜜，或見受身，生諸族姓，或為國王，遇善知

識發菩提心，厭棄國城，出家學道，立大誓願，種種威儀，堅持禁戒，身心寂靜，修諸禪定。往昔所修一切菩薩三世所成般若波羅蜜，為欲開發一切智故，勤求佛法，生正見心；為欲拔濟諸眾生故，事善知識，親近承事，不違言教，尊重恭敬，深生信心，禮拜供養情無懈倦；勤求如來一句正法，徧捨一切內外所有，於身、命、財，心無吝惜，乃至勤求一切法句，亦復如是；如是念念盡未來際，諸所修行，皆為成就一切眾生究竟圓滿智慧業故。

往昔所修一切菩薩三世相應方便波羅蜜，能於一切諸趣類海，普現一切眾生色相相似身雲；以種種威儀善巧攝受，普令眾生獲大饒益。往昔所求一切菩薩所發三世願波羅蜜，所謂：供事一切諸佛願，成熟一切眾生願，嚴淨一切佛剎願，如是所發一切誓願，圓滿修行，所成功德，具足一切如來相好，修諸對治一切善法，滅除一切生死過患，盡未來劫，利益眾生，誓願無盡。往昔所修一切菩薩三世相應力波羅蜜，所謂：出生大願力、普供諸佛力、普淨佛剎力、普修妙行力、普化眾生力。往昔所修一切菩薩三世所行智波羅蜜，恆以一切微細境界圓滿智力，啟悟法界一切眾生，無明睡眠，咸令開覺，究竟出生一切智道。海幢比丘，各於其身，從足至頂，乃至一切毛孔之中所現境界，善財童子，於念念中，無不明見。

爾時善財，一心觀察海幢比丘，深生渴仰，憶念彼不思議三昧解脫，隨順彼不思議三昧自在，思惟彼不思議利益眾生巧方便海，深入彼不思議無作妙用普莊嚴門，愛樂彼不思議甚深信解清淨境界，觀察彼不思議莊嚴法界清淨智，安住彼不思議受佛究竟加持智，出生彼不思議菩薩自在力，堅固彼不思議菩薩大願力，增廣彼不思議菩薩諸行力。如是住立思惟觀察，一日一夜，乃至經於七日七夜，半月一月，乃至六月，復經六日，過此已後，海幢比丘從三昧起。

善財爾時以身布地，恭敬作禮，起立合掌，歎未曾有。讚言：「聖者！如此三昧希有奇特，此三昧門最為甚深，此三昧門最為廣大，此三昧門境界無量，此三昧門神變難思，此三昧門光明無等，此三昧門莊嚴無數，此三昧門威力難制，此三昧門境界平等、不動不亂，此三昧門普照十方一切世界，此三昧門方便無量、有勝堪能。所以者何？如此三昧利益無盡，以能除滅一切眾生無量苦蘊故。所謂：能令一切眾生斷貧窮業故，出地獄苦故，免畜生趣故，絕餓鬼因故，閉諸難門故，開人天道故，親近一切安樂法故，出生人天殊勝樂故，令其愛樂定境界故，能令增長有為樂故，能為顯示勤求出離三界法故，能為引發勤求無上菩提心故，能使增長大福智聚出生因故，能令速疾增長廣博大悲心故，能令出生廣大願力故，能令照明菩薩智道故，能使莊嚴波羅蜜道故，能令深入最勝大乘故，能令明了普賢妙行故，能令趣入諸菩薩地智

光明故，能令積集成就菩薩諸願行故，能令安住一切智智境界中故，能令清淨一切菩薩變化力故，能令勤求一切加持自在力故。聖者！此三昧門，名為何等？」

海幢告言：「善男子！此三昧名普眼捨得，亦名般若波羅蜜境界清淨光明，亦名平等清淨普莊嚴門。善男子！我以修習此平等清淨普莊嚴門而為上首，具足圓滿百萬阿僧祇最勝、最尊無比三昧。」

善財白言：「聖者！此三昧境界，究竟唯如是耶？」海幢言：「善男子！此三昧門境界甚深廣大無量，若有修習，身心寂靜。入三昧時，了知十方一切世界無所障礙，往詣十方一切世界無所障礙，入出十方一切世界無所障礙，莊嚴十方一切世界無所障礙，修治十方一切世界無所障礙，嚴淨十方一切世界無所障礙，見一切佛普徧十方無所障礙，觀一切佛廣大威德無所障礙，知一切佛遊戲神通無所障礙，證一切佛甚深智力無所障礙，入一切佛大功德海無所障礙，興一切佛無上法雲無所障礙，受一切佛無量法雨無所障礙，於諸佛法修習妙行無所障礙，知一切佛轉妙法輪、平等智性、無所障礙，入一切佛道場眾海現神通力無所障礙，隨順十方一切諸佛所起妙行無所障礙，觀察十方一切諸佛演說妙法無所障礙，普入十方一切佛剎咸起神通無所障礙，大悲攝受十方眾生、令其出苦無所障礙，常起大慈充滿十方、與眾生樂無所障礙

，普見十方一切諸佛心無厭足無所障礙，普入十方一切眾生種種解海無所障礙，普知十方一切眾生種種根海無所障礙，普知十方一切眾生種種業海無所障礙。

善男子！我唯知此般若波羅蜜清淨光明三昧法門，如諸菩薩摩訶薩所入甚深究竟智海，所淨最勝諸法境界，所達一切諸佛法門，所往十方無量佛剎，所有大智總持光明，所住圓滿自在三昧，所現清淨種種神通，所具無盡辯才大海，所得無畏美妙音聲、善巧宣說諸地功德，所能擁護一切眾生；而我何能知其妙行，歎其功德，顯其境界，讚其願力，現其光明，入其度門，達其所證，集其勝業，了其次第，如其普徧，住其三昧，見其心境，說其正道，辯其威勢，得其所有平等智慧？

善男子！從此南行至海潮處，彼有大城，名：圓滿光，其城有王，名：妙圓光。於彼城東有一園林，名：普莊嚴，王有夫人，名：伊舍那，為優婆夷，止住此林，修菩薩行。汝往彼問，菩薩云何學菩薩行，修菩薩道。」

時，善財童子於海幢比丘所，得最勝法，獲堅固身，證三昧境，究竟明徹，住清淨解，悟深法界。其心隨順諸佛教海，於諸法門，憶持不忘，安住廣大普莊嚴門，智慧光照充滿十方，心生歡喜，踊躍無量。五體投地，禮海幢足，繞無量帀

，重復頂禮，恭敬瞻仰，思惟觀察，想其容止，持其名號，念其功德，觀其行願，憶其言音，思其三昧。想其所行廣大境界，受其所得總持智慧，清淨光明，諮嗟戀慕，辭退南行。

爾時，善財童子蒙善知識力，令功德身，信解圓滿，依善知識教，正念思惟，念善知識語，遞相開發，於善知識行深生慚愧，愛樂恭敬，觀善知識心，善巧攝受，倍益歡喜。作是念言：「因善知識令我普見一切諸佛；因善知識令我普聞一切佛法；善知識者是我師範，示導於我一切智法普令見故；善知識者是我眼目，令我普見諸佛境界如虛空故；善知識者是我渠流，引我令入諸佛如來蓮華池故。」

如是思念漸次南行，向海潮處。至彼城東，見普莊嚴園，眾寶垣牆周帀圍繞，一切寶樹行列莊嚴。所謂：諸寶葉樹，枝葉扶疎，光彩鮮明，敷榮微妙；諸寶華樹，雨眾妙寶，拘蘇摩華，發燄舒光，布散于地；諸寶香樹，吐妙香雲，香氣氤氳，普熏十方諸佛世界；諸寶鬘樹，雨大寶鬘，莊嚴寶林，處處垂下；摩尼王樹普雨種種大摩尼寶，徧布充滿，隨處莊嚴；一切天寶劫波衣樹，普雨種種妙寶繒綵雜色衣服，隨其所應，敷布嚴飾；寶音樂樹，出妙樂器，微風吹動，發和雅音，其音美妙，過諸天樂；諸寶資具，莊嚴藏樹，各雨眾寶，珍奇玩好；諸莊嚴具，處處分布，以為嚴飾。

其地清淨，無有高下，寬廣平坦，種種莊嚴。園中具有百萬殿堂，大摩尼寶之所合成，百萬樓閣閤浮檀金以為校飾，百萬宮殿毗盧遮那摩尼寶王間錯莊嚴，雲構龍蟠，延袤遠近，葢棟相承，勢如飛動。百萬浴池七寶合成，一切妙寶以為其岸；細妙金沙澄布其底；七寶階道，摩尼欄楯，周帀圍繞，四面莊嚴；寶草芬芳，夤緣際畔；梅檀香水盈滿其中，調適溫涼隨眾生意。寶樹林間，寶渠分布，水清寶珠周徧間錯，晝夜常流八功德水；水中多有鳧鴈、鴛鴦、白鶴、孔雀、迦陵頻伽、拘枳羅等雜色諸鳥，飛集往來，遊戲出沒，整毛理翮，游泳翱翔，出妙好聲，清切和雅，猶如天樂，令人樂聞。

寶多羅樹，周帀行列，覆以寶網，垂諸金鈴，微風徐搖，恆出美音。建立無數摩尼寶幢，雜寶繒旛，四面垂飾，光明普照百千由旬。其中復有百萬陂池，香水湛然，清瑩澄澈，隨時堅細，梅檀香泥，澄迤其下，一切上妙眾寶蓮華菡萏芬敷，大摩尼華光色照耀。園中復有廣大宮殿，名：莊嚴幢，海藏妙寶以為其地，種種形像悉現其中，毗琉璃寶以為其柱，閤浮檀金寶莊嚴網彌覆其上，重樓挾閣，巍巍高大，猶妙金山，見者欣樂。種種勝寶以為莊嚴，光藏摩尼，恆吐妙光以為照耀；毗盧遮那藏摩尼寶王，殊麗校飾，輝映分明；一切眾寶無價香王，咸出妙香，普熏一切。所謂：具足一切最勝

妙寶香王，香氣普騰，氤氳成霧；普現如意妙寶香王，香氣隨應，周聞法界；隨根覺悟，妙寶香王，凡所嗅聞諸根聰利，能於正法，精勤匪懈。

其宮殿中復有無量寶蓮華座，周迴布列。所謂：光照十方妙藏摩尼寶蓮華座、毗盧遮那如意摩尼寶蓮華座、無垢藏摩尼寶蓮華座、雜寶莊嚴摩尼寶蓮華座、普門莊嚴摩尼寶蓮華座、圓光莊嚴摩尼寶蓮華座、安住海藏清淨莊嚴摩尼寶蓮華座、普燄光照摩尼寶蓮華座、金剛藏師子摩尼寶蓮華座、照耀世間摩尼寶蓮華座。如是無量摩尼寶蓮華座，一一皆以不可思議妙寶繪帶四面垂飾，不可思議眾色摩尼以為莊校，於宮殿中，光影相照，平等莊嚴。

空中復有百萬寶帳，所謂：寶衣帳、寶鬘帳、寶華帳、寶香帳、閻浮檀金帳、寶枝垂覆帳、雜寶摩尼帳、妙寶瓔珞帳、光燄金剛帳、諸天妓樂帳、象王神變帳、馬王神變帳、帝釋所坐摩尼寶帳。如是種種寶莊嚴帳，嚴飾虛空。

復有百萬諸大寶網，彌覆其上，所謂：寶鈴網、寶蓋網、寶身網、海藏真珠網、紺瑠璃摩尼寶網、師子摩尼寶網、月愛光明摩尼寶網、一切人天種種形像寶香網、一切雜色寶冠網、一切妙寶瓔珞網。如是等網，各於其上，垂覆莊嚴。

復有百萬大寶光明而為照耀，所謂：燄光摩尼寶光明、日藏摩尼寶光明、月藏摩尼寶光明、香燄摩尼寶光明、吉祥燄藏摩尼寶光明、蓮華燄藏摩尼寶光明、燄幢摩尼寶光明、大燄摩尼寶光明、徧照十方摩尼寶光明、普現香雲莊嚴具摩尼寶光明。如是等類大寶光明而為照耀。

常雨百萬莊嚴具雲，隨意受用；百萬隨時芬馥白梅檀香雲普熏道場；百萬天諸妙樂雲音聲美妙；百萬天曼陀羅華雲而為布散；百萬諸天鬘帶雲處處垂下以為嚴飾；百萬天寶繒綵雲處處垂布以為衣服；百萬出過諸天寶瓔珞雲，莊嚴林樹及諸樓閣。百萬欲界天子欣樂瞻仰，恭敬作禮；百萬諸天姝女往修同行，常來其所，投身而下親近敬奉；百萬諸大菩薩，恆詣道場，常樂聞法。

時，伊舍那，具大人相，坐真金座，戴海藏真珠網冠，挂出過諸天真金寶釧，垂紺青髮，頂髻莊嚴。吉祥燄藏摩尼寶王以為髻帶，毗瑠璃摩尼寶以為耳璫，師子口摩尼寶緣飾耳輪，大如意摩尼寶王以為瓔珞莊嚴其頸，大威德帝青摩尼寶網，以覆其首，種種光燄熾盛摩尼寶網羅覆其身；百千億那由他眾生，曲躬恭敬，親近供養。

東方有無量眾生來詣其所。所謂：大梵天、梵輔天、梵眾天，如是色界一切諸天；欲界他化自在天、化樂天、兜率天、

夜摩天、忉利天、諸龍、夜叉、乾闥婆、阿修羅、迦樓羅、緊那羅、摩睺羅伽、及鳩槃荼，閻羅王界大力鬼神，乃至一切人、及非人，諸王眾等，南西北方、四維上下，亦復如是。其有見此優婆夷者，身病、心病種種所纏，一切邪見、障礙執著，所有惑苦悉得除滅。速離一切諸煩惱垢，速拔一切諸見毒刺，疾破一切諸障礙山，深入無礙清淨境界，種植一切圓滿善根，長養一切善法根芽，入於一切清淨智門，普獲一切陀羅尼門，普證一切大三昧海，通達一切諸佛教海。一切諸佛廣大願門無不開發，一切菩薩所修妙行皆悉現前，一切如來功德大海皆悉清淨。其心廣大，具足一切自在神通；其身無礙，於一切處，靡所不至，普詣十方無所依著，隨順成就一切法門。爾時善財童子，入普莊嚴園，周徧觀察，見伊舍那優婆夷，往詣其所，頂禮其足，繞無數帀，正立合掌，白言：「聖者！我已先發阿耨多羅三藐三菩提心，而未知菩薩云何學菩薩行，云何修菩薩道，我聞聖者，善能誘誨諸菩薩眾，願為我說。」

時，伊舍那告善財言：「善男子！我得菩薩一解脫門無間修習，若有眾生暫見我身、暫聞我名，或聽我法，憶念於我，與我同住，親近隨順供給我者，悉不唐捐。善男子！若有眾生，不種善根，不為善友之所攝受，不為諸佛之所護念，雖近於我，經於多時，與我同住，終不能見。善男子！其有眾生得見我者，皆於阿耨多羅三藐三菩提獲不退轉。善男子！

東方所有一切如來應正等覺，常來至此，處於眾寶妙師子座，為我說法。南西北方、四維上下，一切如來悉來至此，處於寶座，為我說法。善男子！我常不離見佛聞法，與諸菩薩而共同住，不離菩薩三昧解脫。善男子！我此會眾有八萬四千億那由他，常在於此普莊嚴園與我同住，皆於往昔，與我修習一切菩薩同類行門不相離故，一切咸於阿耨多羅三藐三菩提得不退轉。其餘眾生，或久或近，住此園者，一切修我同類行門，亦皆普入不退轉位。」

善財白言：「聖者！發阿耨多羅三藐三菩提心，為久近耶？」答言：「善男子！我憶曾於然燈佛所，親近承事，修行梵行，恭敬供養，聞法受持；次前於離垢佛所，出家學道，受持正法；次前於星宿幢佛所，聞法修行，歡喜供養；次前於妙勝吉祥佛所，次前於蓮華德藏佛所，次前於毗盧遮那佛所，次前於普眼佛所，次前於梵壽佛所，次前於金剛齊佛所，次前於水天佛所。善男子！我憶過去於無量劫無量生中，如是次第三十六恆河沙佛所，皆悉親近，一心承事，恭敬供養，出家學道，所受正法，所發誓願，所入三昧，所證解脫，如是一切種種行門，我皆憶持，心無廢忘。過此已往，佛智所知，非我能測。」

善男子！應知菩薩初發心無有量，充滿一切法界故；菩薩大悲門無有量，普入一切眾生界故；菩薩大願門無有量，究竟

十方一切法界故；菩薩大慈門無有量，普覆一切眾生界故；
菩薩所修行無有量，於一切剎一切劫中恆修習故；菩薩三昧
力無有量，令菩薩道不退轉故；菩薩總持力無有量，能持世
間，隨所應聞，教法海故；菩薩智明力無有量，普能悟入三
世佛教，巧隨順故；菩薩神通力無有量，普現十方一切所有
諸剎網故；菩薩辯才力無有量，圓音一演令諸眾生隨類解故
；菩薩清淨身無有量，現身普徧諸佛剎故。

大方廣佛華嚴經普賢行願品卷第七

離婆離婆帝 求訶求訶帝 陀羅尼帝 尼訶囉帝
毗黎你帝 摩訶伽帝 真陵乾帝 娑婆訶（七遍）

南無喝囉怛那 哆囉夜耶 佉囉佉囉
俱住俱住 摩囉摩囉 虎囉 吽 賀賀
蘇怛拏 吽 潑抹拏 娑婆訶（三遍）

願以此功德 莊嚴佛淨土 上報四聖恩 下濟六凡苦
所有法界眾 悉修菩提行 盡此一報身 同生極樂國